


CELEBRACIÓN EN OS COTOS (na casa)

29 – 30 de agosto do 2020

XXII DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO EN FAMILIA

SAÚDO DE BENVIDA

🎵 *Amigos nas penas*

Celebrante:

Benvidos sexamos todos a esta celebración. Reunímonos para celebrar a fe en familia, e facémolo no nome do Pai e do Fillo e do Espírito Santo.

Vivimos tempos nos que ser coherentes non se estila. O que importa é o momento, e cada momento ten as súas decisións, sen importar o pasado e sen importar o futuro. Vivimos ao día como se iso fora o único que importa.

A proposta de Xesús, en cambio, pasa por asumir o pasado e non ter medo a enfrontarse ao que está por vir. El é consciente de que a súa vida estase encamiñando cara a condena por parte duns cantos, pero iso non o bota para atrás, sen medo fálalle aos seus amigos de canto se aveciña. Aclara que ir con el non é so acompañar de paseo, é cargar coa cruz, é compartir o peso das cruces dos demais, é dar vida aliviando as cruces dos outros.

So así, dende esta coherencia sen medo, tivo sentido a vida para Xesús.

Que a celebración de hoxe nos axude a vivir que estamos pola igualdade e contra o racismo, que estamos por responsabilidade persoal e contra os inconscientes.

ACTO PENITENCIAL E COMPROMISOS

Celebrante: *Xesús pídenos ser coherentes, sabendo que vale a pena compartir coas persoas de ben, coas que acollen, coas que coidan e se coidan, coas que están dispostas a cargar a cruz, coas que queren vivir no xeito de Xesús, por iso agora cremos que nós temos que pedir perdón:*

Monitor/a

- Perdón polas nosas comodidades, rutinas e apariencias, pois ás veces somos pouco coherentes.

SEÑOR, TÉNDENOS A TÚA MAN

- Perdón polas veces que somos pouco tolerantes e respectuosos, e si somos algo racistas fomentando desigualdades.

SEÑOR, TÉNDENOS A TÚA MAN

- Perdón polas nosas fallas de responsabilidade persoal, pois ás veces miramos o mal que fan os demais e non somos capaces de velo en nós.

SEÑOR, TÉNDENOS A TÚA MAN

Celebrante: *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

ORACIÓN PROPIA DO DÍA

Celebrante: *Neste momento en que rematamos a primeira parte da celebración confiamos ás mans de Deus Pai a nosa oración. Recordamos o que está pasando en Estados Unidos por culpa do racismo, e recordamos que nós temos que ser non só crentes senón tamén cribles.*

(silenzo)

Deus, Noso Pai, de ti ven todo don perfecto.
Enche os nosos corazóns con amor a Ti
e aumenta a nosa fe,
para que medre o ben que hai dentro de nós
e para que, coa túa axuda,
vivamos en coherencia co evanxeo.
Pedímoscho polo mesmo Xesucristo,
Noso Señor. Amén

2.- PROCLAMACIÓN DA PALABRA DE DEUS

(sentad@s)

No Leccionario I A páxina 244 Xer 20, 7-9 LECTURA

LECTURA DO PROFETA XEREMÍAS

*Señor, seducíchesme e deixeime seducir;
collíchesme e puideches comigo.*

Sirvo a cotío de burla; a destrución é o meu pan.
Sempre que falo, teño que proclamar: ¡Desastre!;
teño que clamar: ¡Destrucción!

A palabra do Señor volveuse para min un escarnio,
unha burla continua.

Se digo: "Non me vou acordar máis del,
non falarei máis no seu Nome",
entón a súa palabra vólvese coma un lume abrasador
no meu corazón, un lume prendido nos meus ósos;
fago forza por apagalo, pero non son capaz.

Palabra do Señor

♪ *Escoita ao Señor*

SALMO

Celebrante: *Xesús non se deixa levar pola covardía,
mira as dificultades de fronte, sabe que fixo ben e non
lle ten medo as consecuencias.*

*El non lle foxe á realidade, aínda que a realidade vai
cravada nunha cruz. Escoitámolo no evanxeo de hoxe.*

(en pé) *Leccionario I A páx 246 Mt 16, 21-27 EVANXEO*

PROCLAMACIÓN DO SANTO EVANXEO SEGUNDO MATEO

Daquela empezou Xesús a aclararlles aos seus
discípulos que tiña que ir a Xerusalén, e que alí o ían facer
padecer moito os anciáns, os sumos sacerdotes e os
letrados; que o ían executar e que ao terceiro día ía
resucitar.

Pedro, colléndoo á parte, empezou a rifar con el,
dicindo:

- Deus te libre, Señor; a ti non che pasará nada diso de
maneira ningunha.

Pero el, volvéndose, díxolle a Pedro:

- ¡Arreda de min, Satanás! Ti es un tentador para min,
porque non te deixas guiar por Deus senón polos homes.

Entón díxolles Xesús aos seus discípulos:

- Se alguén quere vir comigo, que renuncie a si mesmo,
que cargue coa súa cruz e que me siga. Porque quen
queira poñer a salvo a súa vida, perderaa; pero quen a
perda pola miña causa, poñeraa a salvo. Pois ¿de que lle
serve ao home gañar o mundo enteiro se perde a súa vida?
E ¿que pode dar un home para recobrar a súa vida? Porque
o Fillo do Home ha vir coa gloria de seu Pai entre os
anxos; entón pagará a cadaquén conforme á súa conducta.

Palabra do Señor

(sentad@s) gardamos uns instantes de silencio para acoller
a palabra no corazón



(en pé)

PROFESIÓN DA FE

Celebrante: *Neste encontro familiar, querendo ser crentes e cribles, damos razón da nosa fe:*

Creo, Señor, pero aumenta a miña fe

Monitor/a

Crede en Deus, no Deus que é Pai e Nai, que nos creou á súa imaxe enchéndonos de amor, que pon nas nosas mans o noso coidado, o coidado dos demais e o coidado da terra?

Creo, Señor, pero aumenta a miña fe

Crede en Xesús, que quixo compartir á nosa beira, que nos convida a ser vida para os demais, que nos alenta a camiñar sen medos e sendo coherentes co evanxeo?

Creo, Señor, pero aumenta a miña fe

Crede no Espírito Santo, que se fai realidade no noso corazón e que nos alenta a axudar a cargar as cruces dos que xa non poden máis por culpa do racismo?

Creo, Señor, pero aumenta a miña fe

Crede na igrexa, comunidade sempre chamada a ser en responsabilidade persoal, ilusión e esperanza neste mundo, ás veces, farto de cruces e afogado de pesimismo?

Creo, Señor, pero aumenta a miña fe

ORACIÓN UNIVERSAL

Celebrante: *Movidos pola fe, hoxe queremos rezar polas familias que en tantas circunstancias da súa vida viven baixo o peso da cruz:*

Señor, escóitanos

Monitor/a

✓ Pedimos polas nais e pais da parroquia, para que axuden a medrar aos máis pequenos dende a coherencia e o respecto a un mesmo, aos demais, á natureza e a Deus, oremos

✓ Pedimos polas persoas que teñen a responsabilidade de desempeñar cargos públicos, para que o fagan con coherencia, non buscando o seu propio proveito senón o dos demais e o da natureza, oremos

✓ Pedimos polos fogares que hoxe viven sufrindo as cruces: a cruz da fame, a do paro, a do alcol, a da soidade, a do racismo, a da pandemia... Por todos, oremos

✓ Por nós, para que nestes tempos sexamos responsables e coherentes dando exemplos para o coidado da nosa saúde e da de todos cos que tratamos, oremos

Celebrante: *Grazas Señor porque sabemos que sempre acolles as nosas preocupacións e desexos se os acompañamos de coherencia. Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *Xesús nin aparta, nin se aparta, ao contrario, achégase e non foxe da dor, non foxe da cruz. El fala de dar unha man e compartir. A nosa oración non é para fuxir das cruces e dores, é para amosar a confianza no Deus Pai que sempre está á nosa beira, por iso confiados dicimos: NOSO PAI ...*

SIGNO DA PAZ

Celebrante: *Non pode haber paz nunha sociedade que crucifica por ser negro, muller, maior, refuxiado, pobre, enfermo... Non podemos ser crentes se non somos cribles berrando e loitando á beira de quen se sente inxustamente tratado. Non calemos racismos, vivamos responsabilidade persoal.*

NON COMULGAMOS

PERO ESTAMOS EN COMUÑÓN

Celebrante: *Celebrar a fe é querer estar á beira de Cristo; é comprometer a vida en construír un mundo que sexa todo el esforzo por dar vida ás persoas que senten o peso da cruz.*

Ditosos nós que, coma fogar, hoxe somos convidados a este xeito de vivir.

 ***Na tardiña baixa da vida***

4.- AVISOS E DESPEDIDA

ORACIÓN FINAL

Celebrante:

Oremos:

Señor, Noso Pai, dámosche as grazas porque hoxe, como fogar, podemos compartir a nosa fe.

Queremos medrar sementando ilusións por todas partes, sendo coherentes co evanxeo de Xesús, o teu fillo benquerido, que vive e reina con nós por sempre eternamente. Amén.

Xesús espera que deamos exemplo del nas palabras que non calan as dores e cruces nas que vive moita xente, e espera que deamos exemplo del no feito de dar unha man aliviando o peso de quen vai cargando cruces.


Que a celebración que agora rematamos nos dea azos para vivir contra o racismo, dende o diálogo, a tolerancia e o respecto con quen pensa, vive e cree diferente. Fagámolo coa responsabilidade persoal que a pandemia nos está esixindo.

Que teñamos un bo día, unha boa semana, e que o Señor nos bendiga, † nos garde de todo mal e nos leve ao seu fogar de vida eterna. Amén.



“Se alguén quere vir comigo, que renuncie a si mesmo, que cargue coa súa cruz e que me siga. Porque quen queira poñer a salvo a súa vida, perderaa; pero quen dea a súa vida pola miña causa, poñeraa a salvo?”.

Palabras do evanxeo de hoxe



Fuxir da tolerancia é participar do racismo

